

cui Euphyander assentiri ac sese dedere jure debeat: hinc jurare in verba magistri non debet, nisi veritas ipsa magistra sit; nec Thomistis, nec Scotistis plus equo addictus esse; amici omnes sint veritatis amatores; omnium certè sectarum capita suspicere ac vereri potest, non tamen vilis ad instar mancipii servire; præsertim cum de illorum mente ut plurimum dubitetur; hinc tam multi doctissima in Aristotelem commentaria scripsere, qui tamen inter se nullo modo conveniunt. — Itaq; Euphyander libertatem animi retineat, nulli parti se mancipet, ne aliquando errori servire cogatur; in eo semper statu sit, in quo de rei proposita veritate liberè judicet; uni rationi det manus, eiq; demonstrativa &c. Sequenti Cap. XI. p. 103. postquam Sectariæ Philosophiæ incommoda pluribus enarrasset ac lectu dignissimis verbis; ita porro Euphyandrum suum fideliter monet, istis factionum impedimentis, si sapiat, ne se ingerat vel implicet, sed unius veritatis amore ducatur, etiam in hoste amandam: Si qua in re, inquit, veritas Thomistica est, non propterea stabis à parte Thomistarum; sed tolle quod tuum est, & vade; Si fortè Scotica aut Nominalis; non ideò subtilis Scoti, vel acris Ochami castra sequeris; sed rosam ex illo spineto vel roseto excerpe, & abi; illam animi libertatem intactam serva, quam tibi sub hujus initium libri exposui: Servire Deo, amicis & musis honorificum, imò regium est; sed factionibus seu tumultibus Scholasticis devovere sese, ingenuo adolescente optimoq; ingenio prorsus indignum.

IX. JOH. BAPT. DU HAMEL in Epist. Dedicat. ad Illustriss. COLBERTUM, Galliæ Regis Consiliarium intimum, &c. Tractatui de Corporum Affectionibus præfixa, Meritò, ait, conquireretur Angliæ Cancellarius (Verulamium indigitat, cujus hanc querelam reperire est. Lib. I. de Scient. Augmentis p. m. 19.) quòd plurimæ artes mechanica à tenuibus initiis penè ad summam pervenerint: scientiæ autem, quæ in rerum contemplatione versantur, immotis veluti stent vestigiis, & statuarum more adorentur, non promoveantur. Idq; eorum inertiam factum existimat,